



## INTRODUCZIUN

DAD URSICIN G. G. DERUNGS

*La multiplicaziun dils pauns ei in tema recurrent ella Bibla. El ha sia actualitad, mo ei en quella fuorma tuttina jasters per nies temps. Ella liturgia vegn quei tema applicaus all'eucaristia. È questa dumengia, che preveda sco evangeli la multiplicaziun dils pauns tenor Gion 6, ch'introducescha il grond discuors de Jesus entuorn il paun da tschiel. – L'episoda ord la sequenza dellas miraclas dil profet Elias interpretescha è igl evangeli: moltiplicar pauns, vul dir: dar da magliar cun pauc a biars.*

*Il profet fa quei, e fa ei sco profezia: il nutriment dil profet arva in avegnir, sco quei che la profezia arva in avegnir. Leutier: il paun ei il Plaid de Diu sez. È quel che serepeta onn per onn ella liturgia, e che vegn evidentamein mai consumaus dil tut, ha adina aunc in surpli da muntadas e da forza, eba las «vanzadiras» che tonschan «per l'entira jamna», insumma per il temps a vegnir. – Quei che nus stuein forsa recuperar ozildi ei il senn profetic buca mo dil Plaid de Diu, mobein è dell'existenza cristiana. Pertgei «nus» stuein dar da magliar senza quintar cons «pauns» che nus vein: ei vonza adina aunc. E quei numnein nus la grazia de Diu.*

## 1. LECZIUN

2 Re 4,42–44

Lez dis ei in um da Baal-Salisa vegnius ed ha purtau agl um da Diu vegn pauns dumiech dall'emprema raccolta e graun smaccau en siu sac. Cheu di Elisa<sup>o</sup>: Dai quei da magliar alla glieud! Siu survient rispunda: Co sai jeu presentar quei a tschien umens? Mo el di: Dai quei da magliar alla glieud; pertgei aschia plaida il Segner: Ins vegn a magliar ed aunc schar vanzar.

Cheu ha el presentau quei ad els, ed els han magliau ed han aunc schau vanzar tenor il plaid dil Segner.

<sup>o</sup> Vegn era numnaus Elischa ed ei in scolar e vegnentsuenter dad Elja